

KINDERKERK LES: Woord Studie - Evangelie 1

Doel van les:

Ons gesels hierdie kwartaal bietjie oor moeilike woorde wat in die Bybel voorkom.

Nuwe Testament Bybelboek bewegings:

- **Matteus** - Albei hande bokant jou kop in 'n kroon en laat jou hande afsak asof jy die kroon op jou kop sit. (Koningskap van Jesus - God het finaal kom wys wie die Koning van die konings en die Heer van die Here is.)
- **Markus** - Arms af, hande gevou voor jou en kop gebuig. (Beklemtoon Jesus as DIENSKNEG van God.)
- **Lukas** - Hou al tien vingers op, maak hulle toe en weer oop - tien uit tien - (Jesus is die perfekte mens, die Seun van die Mens.)
- **Johannes** - Maak asof jy 'n baba wieg en wys dan op na die hemel. (Jesus is die Seun van God. Beklemtoon Jesus se goddelikheid. Hy is ten volle God.)
- **Handelinge** - Gebruik jou regterhand se wysvinger en middelvinger om op en af jou linkerarm te loop. (Vestiging van die kerk. Evangelie van Jesus na die uithoeke van die wêreld versprei is.)
- **Romeine** - Wys thumbs up. (Paid in full. Beklemtoon dat Jesus die gelowiges se straf ten volle betaal het. Gelowiges in die regte verhouding met God geplaas het.)
- **1 Korinthiërs** - Wys 'n 1 met jou wysvinger en slaan dan met jou regterhand jou linkerhand asof jy pak gee. (Kerngedagte: Spanking the saints. Paulus skryf aan die gemeente om vele verkeerdhede reg te stel waarmee die gemeente sukkel.)
- **2 Korinthiërs** - Wys 'n 2 met jou wysvinger en middelvinger en slaan dan met jou regterhand jou linkerhand asof jy pak gee. (Kerngedagte: Anatomy of an apostle Paulus skryf aan die gemeente om vele verkeerdhede reg te stel waarmee die gemeente sukkel. Paulus beskerm sy apostoliese gesag teen dwaalleraars.)
- **Galasiërs** - Hou jou twee wysvingers oor mekaar in 'n x en skud jou kop nee. (Paulus waarsku die Galasiërs om nie ekstra goed by te voeg by Jesus se verlossingsdaad nie. Jesus het gelowiges verlos uit die boeie van godsdienstigheid en wettisme. Vrygemaak van die leuen dat jy jouself kan red)
- **Efesiërs** - Hou jou twee wysvingers op en vleg hulle inmekaar. (Christene moet 'n eenheid vorm en saamwerk.)
- **Filippense** - Wys na jou gesig en glimlag. (*happily humble* - In Jesus is ons vreugde.)

Ysbreker 1: Goeie nuus - Gee die kinders kans om in hulle groepe te vertel van 'n tyd toe hulle goeie nuus gekry het.

Kry terugvoering van die groepe. Vertel ook van 'n tyd toe jy goeie nuus gekry het.

Sê: Ons het nou so baie gepraat van goeie nuus, dit laat my sommer dink aan 'n moeilike woordjie in die Bybel. Die woord is Evangelie. Evangelie beteken 'goeie nuus'. Watter goeie nuus dink julle kan dit wees? Kom ons kyk of ons kan uitvind.

Aktiwiteit 1: Gee vir elke groep 'n klomp geel lego blokkies waarmee hulle 'n huisie moet bou.

Vra: As julle na die geel huisie kyk, waaraan laat dit julle dink?

Geel huisie - Dit laat ons aan die hemel dink. Die hemel is God se huis. Daar is geen nag daar nie. Die Bybel praat van hoe God lig is en dat daar geen duisternis (donkerte) in Hom is nie. Die Bybel vertel ons dat die strate in die hemel van suiwer, goudagtige glas gemaak is. God vertel ons ook baie ander dinge van Sy huis. Niemand is ooit siek daar nie, niemand is blind of kan nie lekker loop nie. Niemand gaan ooit dood nie. Elke mens in die hemel is altyd gelukkig. Die beste van alles is dat God die Vader, Jesus en die Heilige Gees daar is. God het die hemel gemaak en ook vir jou. Hy is baie lief vir jou. Daarom wil Hy graag hê dat jy saam met Hom daar moet bly.

Aktiwiteit 2: Gee vir elke groep 'n klomp swart lego blokkies waarmee hulle 'n hartjie moet maak.

Vra: As julle na die swart hartjie kyk, waaraan laat dit julle dink?

Swart hartjie - Daar is een ding wat nooit in die hemel kan wees nie. Dit is sonde. Ons mense hou daarvan om ons eie ding te doen eerder as wat God wil hê. Watter sondes kan julle opnoem? Om slegte dinge te doen of slegte dinge te sê, is sonde. Sonde maak God ongelukkig. Sonde het al baie hartseer en ongelukkigheid in die wêreld gebring. Die Bybel vertel ons dat almal sondig. Nie een mens is sonder sonde nie. Die swart hartjie laat ons dink daaraan dat ons almal sonde doen. God is sonder sonde/heilig en kan sonde nie voor Sy oë verdra nie. God kan sonde nie toelaat daar waar Hy is nie. God sê dat sonde gestraf moet word. Die straf vir sonde is die dood en om vir altyd weg van God te wees. God het geweet dat daar niks is wat ons kon doen om ons sonde weg te vat nie en omdat Hy ons so liefhet, het Hy self 'n plan gemaak.

Aktiwiteit 3: Gee vir elke groep 'n klomp rooi lego blokkies waarmee hulle 'n kruis moet maak.

Vra: As julle na die rooi kruis kyk, waaraan laat dit julle dink?

Rooi kruis - Die rooi kruis wys die plan wat God gemaak het om ons sondes weg te vat. God is lief vir ons. Hy het Sy Seun Jesus van die hemel af gestuur, om die straf vir ons sondes te dra. Hy het aan die kruis gehang en God het al ons sondes op Jesus gesit. Al ons gek, slegte woorde, baklei het Jesus gedra. Elke laaste druppel bloed het uit Sy liggaam gevloei vir ons. Net Jesus se bloed kan ons sondes afwas. Hy het op die derde dag opgestaan uit die dood. God het Sy liefde aan ons gewys deur Sy Seun vir ons te stuur en daar is geen ander manier om hemel toe te gaan, behalwe deur Jesus nie.

Aktiwiteit 4: Gee vir elke groep 'n klomp wit lego blokkies waarmee hulle 'n hartjie moet maak.

Vra: As julle na die wit hartjie kyk, waaraan laat dit julle dink?

Wit hartjie - Water kan nie sonde weg was nie. Om goeie dinge te doen, kan sonde nie weg was nie. Net die bloed van Jesus kan. Die wit hartjie wys dat Jesus se bloed ons sondes wegwas. Het Jesus vir almal gesterf? - Ja. Gaan almal hemel toe? Nee. Die rede is omdat almal nie in Jesus glo nie of hul hartjies vir Hom wil gee nie.

Aktiwiteit 5: Gee vir elke groep 'n klomp groen lego blokkies waarmee hulle 'n boom moet maak.

Vra: As julle na die groen boom kyk, waaraan laat dit julle dink?

Groen boom - Die groen boom laat ons dink aan nuwe lewe. Die kleur groen laat jou dink aan dinge wat buite groei, bv. blare, gras, blomme en bome. Wanneer jy jou hartjie vir Jesus gee, is jy soos 'n babatjie in God se familie. So moet ons dan grootword en in Jesus groei. Hoe doen ons dit? (Bybel lees, gebed, kerk toe gaan, te luister na God se wil en op Hom te wag, die Heilige Gees wat ons help.)

Sê: Maatjies, dit is nou die Evangelie. Ek weet nie van julle nie, maar ek dink dit is die beste nuus ooit. Jesus wat vir my en julle so lief is, dat Hy vir ons kom sterf het, sodat ons eendag saam met Hom in die hemel kan bly, is regtig goeie nuus.

Indien daar tyd is oefen weer die Bybelboek bewegings.

Sluit af in groepe met gebed.